

श्री आदिनाथ जिन पूजा

(पं. जिनेश्वरदासजी कृत)

नाभिराय मरुदेवि के नन्दन, आदिनाथ स्वामी महाराज ।
सर्वार्थसिद्धितैं आप पधारे, मध्यलोक माहिं जिनराज ॥
इन्द्रदेव सब मिलकर आये, जन्म महोत्सव करने काज ।
आह्वानन सब विधि मिल करके, अपने कर पूजें प्रभु पांय ॥

ॐ ह्रीं श्री आदिनाथजिनेन्द्र ! अत्र अवतर अवतर संवौषट् ।

ॐ ह्रीं श्री आदिनाथजिनेन्द्र ! अत्र तिष्ठ तिष्ठ ठःठः ।

ॐ ह्रीं श्री आदिनाथजिनेन्द्र ! अत्र मम सन्निहितो भव-भव वषट् ।

क्षीरोदधि को उज्ज्वल जल ले, श्री जिनवर पद पूजन जाय ।
जन्म जरा दुख मेटन कारन, ल्याय चढ़ाऊँ प्रभु के पांय ॥
श्री आदिनाथ के चरणकमल पर, बलि-बलि जाऊँ मनवचकाय ।
हे करुणानिधि भव दुःख मेटो, यातैं मैं पूजों प्रभु पांय ॥

ॐ ह्रीं श्री आदिनाथजिनेन्द्राय जन्मजरामृत्युविनाशनाय जलं निर्वपामीति स्वाहा ।

मलयागिरि चन्दन दाह निकन्दन, कंचन झारी में भर ल्याय ।
श्रीजी के चरण चढ़ाओ भविजन, भव आताप तुरत मिट जाय ॥श्री. ॥

ॐ ह्रीं श्री आदिनाथजिनेन्द्राय संसारतापविनाशनाय चंदनं निर्वपामीति स्वाहा ।

शुभशालि अखंडित सौरभमंडित, प्रासुक जलसों धोकर ल्याय ।
श्रीजी के चरण चढ़ावो भविजन, अक्षय पद को तुरत उपाय ॥श्री. ॥

ॐ ह्रीं श्री आदिनाथजिनेन्द्राय अक्षयपदप्राप्तये अक्षतान् निर्वपामीति स्वाहा ।

कमल केतकी बेल चमेली, श्रीगुलाब के पुष्प मँगाय ।
श्रीजी के चरण चढ़ावो भविजन, कामबाण तुरत नसि जाय ॥श्री. ॥

ॐ ह्रीं श्री आदिनाथजिनेन्द्राय कामबाणविध्वंसनाय पुष्पं निर्वपामीति स्वाहा ।

नेवज लीना षट्-रस भीना, श्री जिनवर आगे धरवाय ।
थाल भराऊँ क्षुधा नसाऊँ, ल्याऊँ प्रभु के मंगल गाय ॥श्री. ॥

ॐ ह्रीं श्री आदिनाथजिनेन्द्राय क्षुधारोगविनाशनाय नैवेद्यं निर्वपामीति स्वाहा ।

जगमग-जगमग होत दशों दिश, ज्योति रही मन्दिर में छाये।
 श्रीजी के सन्मुख करत आरती, मोहतिमिर नासै दुखदाय॥
 श्री आदिनाथ के चरणकमल पर, बलि-बलि जाऊँ मनवचकाय।
 हे करुणानिधि भव दुःख मेटो, यातैं मैं पूजों प्रभु पांय॥
 ॐ ह्रीं श्री आदिनाथजिनेन्द्राय मोहान्धकारविनाशनाय दीपं निर्वपामीति स्वाहा।
 अगर कपूर सुगन्ध मनोहर, चन्दन कूट सुगन्ध मिलाय।
 श्रीजी के सन्मुख खेय धुपायन, कर्म जरे चहुँगति मिटि जाय॥श्री॥
 ॐ ह्रीं श्री आदिनाथजिनेन्द्राय अष्टकर्मदहनाय धूपं निर्वपामीति स्वाहा।
 श्रीफल और बादाम सुपारी, केला आदि छुहारा ल्याय।
 महा मोक्षफल पावन कारन, ल्याय चढ़ाऊँ प्रभु के पांय॥श्री॥
 ॐ ह्रीं श्री आदिनाथजिनेन्द्राय मोक्षफलप्राप्तये फलं निर्वपामीति स्वाहा।
 शुचि निरमल नीरं गन्ध सुअक्षत, पुष्प चरु ले मन हरषाय।
 दीप धूप फल अर्घ्य सुलेकर, नाचत ताल मृदंग बजाय॥श्री॥
 ॐ ह्रीं श्री आदिनाथजिनेन्द्राय अनर्घ्यपदप्राप्तये अर्घ्यं निर्वपामीति स्वाहा।

पंचकल्याणक

(दोहा)

सर्वारथसिद्धि तैं चये, मरुदेवी उर आय।
 दोज असित आषाढ़ की, जजूँ तिहारे पांय॥
 ॐ ह्रीं श्री आषाढकृष्णद्वितीयायां गर्भकल्याणकप्राप्ताय श्रीआदिनाथजिनेन्द्राय
 अर्घ्यं निर्वपामीति स्वाहा।
 चैतवदी नौमी दिना, जन्म्या श्री भगवान।
 सुरपति उत्सव अति करुचा, मैं पूजों धर ध्यान॥
 ॐ ह्रीं श्री चैत्रकृष्णनवम्यां जन्मकल्याणकप्राप्ताय श्रीआदिनाथजिनेन्द्राय अर्घ्यं
 निर्वपामीति स्वाहा।
 तृणवत् ऋद्धि सब छाँड़ि के, तप धार्यो वन जाय।
 नौमी चैत्र असेत की, जजूँ तिहारे पांय॥
 ॐ ह्रीं श्री चैत्रकृष्णनवम्यां तपकल्याणकप्राप्ताय श्रीआदिनाथजिनेन्द्राय अर्घ्यं
 निर्वपामीति स्वाहा।

फागुन वदि एकादशी, उपज्यो केवलज्ञान ।

इन्द्र आय पूजा करी, मैं पूजों इह थान ॥

ॐ ह्रीं श्री फाल्गुनकृष्णैकादश्यां ज्ञानकल्याणकप्राप्ताय श्रीआदिनाथजिनेन्द्राय अर्घ्यं
निर्वपामीति स्वाहा ।

माघ चतुर्दशि कृष्ण की, मोक्ष गये भगवान ।

भवि जीवों को बोधि के, पहुँचे शिवपुर थान ॥

ॐ ह्रीं श्री माघकृष्णचतुर्दश्यां मोक्षकल्याणकप्राप्ताय श्रीआदिनाथजिनेन्द्राय अर्घ्यं
निर्वपामीति स्वाहा ।

जयमाला

आदीश्वर महाराज, मैं! विनती तुमसे करूँ ।

चारों गति के माहिं मैं दुख पायो सो सुनो ॥

कर्म अष्ट मैं हूँ एकलो, यह दुष्ट महादुख देत हो ।

कबहूँ इतर निगोद में मोकूँ, पटकत करत अचेत हो ॥

म्हारी दीनतणी सुन वीनती ॥टेक ॥

प्रभु कबहुँक पटक्यो नरक में, जठै जीव महादुख पाय हो ।

नित उठि निरदई नारकी, जठै करत परस्पर घात हो ॥म्हारी. ॥

प्रभु नरक तणा दुःख अब कहूँ, जठै करें परस्पर घात हो ।

कोइयक बाँध्यो खंभसों, पापी दे मुदगर की मार हो ॥म्हारी. ॥

कोइयक काटें करोतसों, पापी अंगतणी दोय फाड़ हो ।

प्रभु यह विधि दुःख भुगत्या घणा, फिर गति पाई तिरयंच हो ॥ म्हारी. ॥

हिरणा बकरा बाछला, पशु दीन गरीब अनाथ हो ।

प्रभु मैं ऊँट बलद भैंसा भयो, जापै लदियो भार अपार हो ॥म्हारी. ॥

नहिं चाल्यौ जठै गिर पस्यो, पापी दे सोटन की मार हो ।

प्रभु कोइयक पुण्य संजोगसूँ, मैं तो पायो स्वर्ग निवास हो ॥म्हारी. ॥

देवांगना संग रमि रह्यो, जठै भोगनि को परिताप हो।
 प्रभु संग अप्सरा रमि रह्यो, कर-कर अति अनुराग हो॥म्हारी.॥
 कबहुँक नंदनवन विषैं प्रभु, कबहुँक वन गृह माहिं हो।
 प्रभु यह विधिकाल गमायकैं, फिर माला गई मुझाय हो॥म्हारी.॥
 देव थिती सब घट गई, फिर उपज्यो सोच अपार हो।
 सोच करत तन खिर पड़्यो, फिर उपज्यो गरभ मैं जाय हो॥म्हारी.॥
 प्रभु गर्भतणा दुःख अब कहूँ, जठै सकड़ाई की ठौर हो।
 हलन-चलन नहिं कर सक्यो, जठै सघन कीच घनघोर हो॥म्हारी.॥
 माता खावै चरपरो, फिर लागै तन संताप हो।
 प्रभु ज्यों जननी तातो भखै, फिर उपजै तन संताप हो॥म्हारी.॥
 औंधे मुख झूल्यो रह्यो, फेर निकसन कौन उपाय हो।
 कठिन-कठिनकर नीसर्यो, जैसे निसरै जंत्री में तार हो॥म्हारी.॥
 प्रभु फिर निकसत ही धरत्याँ पड़्यो, फिर लागी भूख अपार हो।
 रोय रोय बिलख्यो घणो, दुख वेदन को नहिं पार हो॥म्हारी.॥
 प्रभु दुख मेटन समरथ धनी, यातैं लागूँ तिहारे पांय हो।
 सेवक अरज करै प्रभू मोकुँ, भवदधि पार उतार हो॥म्हारी.॥

(दोहा)

श्रीजी की महिमा अगम है, कोई न पावै पार।

मैं मति अल्प अज्ञान हों, कौन करै विस्तार॥

ॐ ह्रीं श्री आदिनाथजिनेन्द्राय अनर्घ्यपदप्राप्तये जयमालामहाधर्म्यं निर्वपामीति स्वाहा।

(दोहा)

विनती ऋषभ जिनेश की, जो पढ़सी मनलाय।

सुरगों में संशय नहीं, निहचै शिवपुर जाय॥

(पुष्पाञ्जलिं क्षिपेत्)